



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Israel-i Strait of Hormuz anasa IRGC Navy tekolakba tepset

Bengaluru FC nung Pep Munoz head coach kumogoo

VOL. XXIII ISSUE NO. 163 (ADOK 163) DIMAPUR ROGONÜ (FRIDAY) METSÜREMI (MARCH) 27, 2026

₹ 5.00

Nalagaland nung LPG peria lir, tetsübo: Sorkar

Dimapur, Metsüremi/March 26 (TYO): Nagaland nung LPG aser danga petroleum products agi anünga mali, anungji nüburtem tsüboa malitsüla mesüra olulu angashir tali mebendentsüla, ta Department of Food and Civil Supplies ajanga jangjashitsüogo.

Department-i Brehostibarnü sangdong ka nung ashiba agi, oil marketing companies temi domestic aser commercial LPG peria yua lir, aser state tesem ajungalen supply lines akhi ama shidak lir.

Tesem kar nung osang mejangja prokshiba ajanga anüng-

apongtsü akok ta shisaboludaktsür, aser tetsübo nung LPG cylinders aser totzü talila alidenba ajanga distribution system nung timtem ajurutsü ta ashi.

Nüburtemi official sangdong nung amangtsüla aser mejangjaba osang meporokshitsüla.

Department-isa deputy commissioners aser ketsdangsurtem dang pei district nung supply aser distribution nung timtem majurutsüsa tenük yoktsü aser talitabong bendenba aser black marketing nungi kumzüka jenjang shidak agi yokdaktsütsü totuyuba agütsü.

NLTP Act ya sorkar tebilemstü lir: CAN

Dimapur, Metsüremi/March 26 (TYO): Nagaland Liquor Total Prohibition (NLTP) Act nung arogo balala tangateba nungi Catholic Association of Nagaland (CAN) pilaogo aser liquor policy ya pulpit masü saka state tebilemstü lir ta ashi.

Brehostibarnü sangdong ka agütsüba nung CAN-i state nung yi ajanga timtem agütsüba tebilemstü lir saka Nagaland Liquor Total Prohibition (NLTP) Act yagi pa nükjidong tongteta meinyakteter, ta ashi.

Tenokdangba ajanga yi ajemba telungi yoka azüoktsü melen lokti menenba inyaksangshi ang tali adokdaktsür, ta ashi.

"NLTP onük ya 'legal aser policy matter' asünung, ibai state

sorkar meyong aser arogo tem meyong masü, aser "dry state" tebilemstü tajung süaka ibaji ajanga tanüla nung aliba lokti ka kuma memelenshitsütsü," ta CAN-i ashi.

Yi ajemba ya alima ajanga nung asangsang tebilemstü ka lir aser okshia nokdangba kisüng ajanga iba tebilemstü mokoktetsü, ta ashi.

CAN-i arogo balala dang iba tebilemstü ya "limited emotional views" nungi masü "theological perspective" tuluba nungi rangloktü ayongzüik.

Laishiba tesayuba nung yi khenyongi nokdangba mesüra ajemtsü ajungshiba mali, saka tali mamshitsü tekumdangtsü ang shia lir, ta CAN sangdong ajangasa ashi.

IND candidate Imchatoba indang election tamaitü noksa lungro asütsü

Mokokchung, 26th March (TYO): Imchatoba Imchen, shiba aruya aliba 28-Koridang Assembly Constituency by-election nung Independent candidate ka ama tokteptsü lir, pa indang election tamaitü noksaji lungro (bricks) asütsü, ta 26th March, 2026 nü Hotel Magnus Mokokchung nung osangbener senden ka akadang pai sangdonga liasü.

Polling anogoji 9th April, 2026 lir aser tanü (26/03/2026) candidate withdrawal anogo liasü, saka onok 6 shingaiia withdraw masü, aji oda, "machine nungji onok 6 den onok indang tamaitü noksa keter alitsü aser kü indang tamaitü noksaji lungro lir, anungji, nüburtemi ni Koridang sanger lenitsü temsüa lir ta bilemra, temeim agi kü indang tamaitü noksa nungji ajenloktsütsü mepishir", ta Imchatoba-i metetdaktsü.

tejangja lir, Koridang terenlok aser yimjiyimjung asoshi noktaker. Lanur aser tetsür jenjang ajungkettsü asoshi tiyongtsü sür inyaksü, Koridang nung ya aluyimba tsütsü ngujem kanga lir aser noklang nung 60-70% bo aluyimba nung amdaka lir, anungji, iba nungjia temlung agütsütsü, aser ano constituency tejakleni anitsü asoshi teinyaktsü mangdang aika yur noktaker, anungji, nüburtemi pa nem yimli agütsütsü asoshi paisa mepishia metetdaktsü.

Mezüng nungi election junga tembangtsü asoshi "free & fair" dak rangloker inyaka arudar aser election matem tashi yamaji inyaksü tangatetba lir, ta pai ashi. Koridang ya regional mungjen ka asünung, Naga yimden tebilemstü onük nunga akokba tashi ayimjema inyaksü merangtsü, ta iba osangbeneri asüngdangba ka langzüa ashi.

(Maneni tapak 2 nung...)

CM Rio-i 2026-27 atema sen 337.04 cr deficit budget benok

Kohima, Metsüremi/March 26 (TYO): Brehostibarnü Nagaland Chief Minister Neiphu Rio-i financial year 2026-27 atema sen 337.04 crore deficit budget benoka liasü.

State Budget session phase tanabuba mezüng anogo nung finance portfolio bena alisang CM Rio-i Budget benokdang, fiscal tasenba atema state tangutsü sen ajak agi 22,507.10 crores aser teindoktsü sen ajak agi 22,127.33 alitsü ta asadangtet.

State indang Own Tax and Non-Tax Revenue receipts sen 2714.44 crore, Central Taxes nung State share sen 7341.28 crore, Central Assistance (Grants & Loans) sen 9471.08, Internal Debt sen 2978.77 crore aser State sorkari Recovery of Loans and Advances nungi sen 1.53 crore angutsü imlar, ta pai ashi.

Teindokba tsütsü Non Development expenditure (Servicing of Debt maden) sen 13,337.51 crore, Servicing of Debt (Ways and Means Advances (WMA) menokba densema) sen 2618.74 crore, Development Expenditure (CSS etc densema) sen 6171.08 crore alitsü, ta Rio-i ashi.

Public account atema sen 305 crore lezmütsü, yangji pensions agütsüba densema teindoktsü ajak agi 22127.33 alitsü ta pai ashi.

2026-27 mapang gross receipts aser expenditures nungi talila sen 74.77 crore anüngtsü, ajüsüaka negative opening balance sen 411.81 crore (2025-26 atema closing deficit) aliba mechi fiscal tasenba ya negative balance sen 337.04 crore nung shibangtsü



Dr. Neiphu Rio

ama asadangteter ta ashi.

"Taküm budget ya 'inclusive, sustainable, growth oriented' lir. Ibai Budget Statement ka kisüng masü; ibai Roadmap ka lir - Developed Nagaland @ 2047 atema tasa tongtipang ka lir," ta Rio-i Budget benokdang ashi.

Chief Minister-i inyakyim tasen 17 tenüktsü aser yangji sen 62 crore indoktsü metetdaktsü.

Fiscal tasenba nung Development Outlay ya sen 1350 crore alitsü, koba taoba küm lezmükba sen 1200 crore nung shilem 12.50 temlokba alitsü ta ashi.

General Services & Others nem shilem tuluba, sen 259.98 crore (shilem 19.26) lezmütsü, anungji administrative aser miscellaneous nung aika indoktsü sayur.

General Economic Services nem sen 253.97 crore (shilem 18.81) lezmütsü, Centrally Sponsored Schemes (CSS) nung State Share Pool atema sen 250 crore (shilem 18.52), health, education aser welfare densema

Social Services atema cen 235.74 crore (shilem 17.46) lezmütsü.

Aluyimer timba aliba state ka süaka Agriculture & Allied Sector atema sen 59.74 crore (shilem 4.43) lezmütsü aser Transport Sector atema sen 41.42 crore (shilem 3.07) lezmütsü.

Energy, industries, rural development, science & technology, aser special area programs amala nung tilaba saka tali tejangjaba lezmütsü, ta Rio-i ashi.

Financial Years 2026-2031 awajemba Sixteenth Finance Commission-i 'horizontal devolution' atema formula melenshi aser iba yongji Central Taxes nung Nagaland indang share shilem 0.569 aliba nungi shilem 0.481 kumtsü, koba shilem 15 shi ajemba lir, ta CM-i ashi.

Iba yongji 2026-27 küm atema Central taxes nungi State share sen 7341 crore angutsü takzüteter, aser taoba devolution formula asübo sen 8684 crore angutsü liasü, aser iba yongji state indang developmental expenditure ajemtsüsa akum, ta pai ashi.

Innovation Seed Fund for nano women entrepreneurs atema sen 2 crore lezmütsü aser ibaji ajanga state nung tetsür 1000 yaritsü, ta ashi.

Nagaland nung district asem - Mokokchung, Chümoukedima aser Kohima atema pilot mode nung Pink Scooty Taxis 50 agütsütsü.

NLA Speaker Sharingain Longkumer-i Budget 2026-27 agizüktsü atema Hokulbarnü jembitsü ta ashi.

FNTA atema state sorkari mera agir, interim body atema Bill benokogo

Kohima, Metsüremi/March 26 (TYO): Frontier Nagaland Territorial Authority (FNTA) mapa kuma aotsü asoshi state sorkari mera agi tenükogoo, ta Chief Minister Neiphu Rio-i Brehostibarnü ashi aser interim body tentettsü atema tang temendak Assembly session nung nüngdakba Bill benokogo.

Nagaland Legislative Assembly budget session 2026-27 tanabuba phase mezüng anogo (March 26, 2026) nung Deputy Chief Minister in-charge of Home, Yanthungo Patton-i FNTA Bill 2026 benok.

Iba Bill indang osang tejangja kecha magütsü aser Speaker Sharingain Longkumer-i Hokulbarnü iba Bill indang jembishinüa agizüktsü ta metetdaktsü.

State Budget 2026-27 benokdang finance portfolio bena alisang CM Rio-i FNTA amenoktsü atema Memorandum

of Agreement zülutepba asoshi anüdoklen district tem nung aliba nüburtem nem tenüngsang agütsü aser iba otsüsütsü Agreement asoshi Union Government aser State nung stakeholders ajunag dang pelaba lemsatepa liasü.

FNTA Interim Body tentettsü atema State sorkari temlung agüja inyaka arur, anungji House nung FNTA Bill benok, ta pai ashi.

Rio-i FNTA atema Grants sen 100.57 crore alitsü, koba non-transferred Department densema State tesem balala nung teinyaktsütem bentetba sülen State development fund nungi total divisible pool sako lemsama alitsü ta metetdaktsü.

Pai osangbener den jembidang MoA ya February 5 nü Government of India, State sorkar aser Eastern Nagaland People's Organisation (ENPO) tsüngta zülutepa FNTA tentettsü asoshi lenmang lapok ta ashi.

State Budget menur benokba

ajanga Bill ya tera menudaktsür benok, ta pai rateta ashi.

"Agreement nung ama asenoki Centre den shisa lemsateptsü nüngdaker. Yamaji onoki Union Home Secretary dangi shisa meshia zülüogo," ta Rio-i ashi.

Bill ya State indang Law and Justice Department-i yanglu, kong MoA nung aliba provisions inoksem aser Advocate General-i shisa agütsüba nung ajemdaker renem, ta chief minister-i ashi.

State-i osang yokba nung Centre nungi telangzüba agüja mali, saka ENPO den züngzüktepba ama sorkari Bill benok, ta pai ashi.

Union Home Secretary den sensaksemba mapang, iba maparen inyaksü asoshi Centre nungi tenokdangba mali ama angatet aser Union Home Minister Amit Shah-i April ita tashinung FNTA semzüktsü tejangraba lir, ta CM Rio-i ashi.

Zunheboto nung MMU vehicle health dept nem bendaga agütsü



Department of Health & Family Welfare aser NHM, Nagaland nungi ketdangsürtem den district representative aser Swasthi - The Health Catalyst, TATA AIG General Insurance Co. Ltd., aser The Entrepreneurs Association (tEA) nungi partner tem den tangokba noksa nung angur.

Dimapur, Metsüremi/March 26 (TYO): Zunheboto district nung Mobile Medical Units (MMU) dak sendakba nung project aser social protection services ajungketba mapa tembanga inyakba sülen Swasthi - The Health Catalyst aser parnok indang partner entities - The Entrepreneurs Association (tEA) aser TATA AIG den longjemer National Health Mission (NHM)-i, Department of Health & Family Welfare, Government of Nagaland nem mapa maneni benoka inyaktsü atema MMU vehicle bendanga agütsüogo.

Iba sentong ya March 26 nü Directorate of Health & Family

Welfare, Kohima nung agia liasü. Temetetsü kaji temalen shisema aliba mapa ya tang telok ana tsüingda tenangzüktepba yangluba sülen Kiphire district nung benoka inyakdar, aser shilem balala küma lemsar tanga district tem nunga benoka inyakyonga aotsü. Iba den bendenloksema Swasthi - The Health Catalyst-i, District Hospital, Mon nem blood bank equipment agütsüogo aser tanga mozükitem nema iba amala mesükba teyari agütsütsü. Sentong nung Swasthi - The Health Catalyst, Bangalore nungi N. Rambabu-i, Zunheboto aser Kiphire district na nung MMU inyakyim indang metetdaksü.

Pai, operational model aser iba mapa ajanga tajangzüik angutsü aliba indang lemsatsep. Paisa, strategic partnership ajanga community health nongittsü atema parnok bendanga agütsür aliba nenshia metetdaksü. Sentong ya kuli kakettem nung sign sütepba aser MMU vehicle ya Swasthi aser parnok partner tem ket nungi Department of Health & Family Welfare-i agizükba sülen tambanga liasü. MMU tasenba yagi Zunheboto district nung lokti tem aser talisa kinük nung alirtem nem indang indanga medical service balala agüja healthcare jenjang tajungba kümdaktsütsü imlar.

Mokokchung nung palliative care training agütsü

Dimapur, Metsüremi/March 26 (TYO): Basic palliative care dak sendakba nung Mokokchung District kübok Medical officer aser nurse tem district level training ka March 26 nü CMO, Conference hall nung agiogo. Sentong nung ojembiba mapang Dr. Limanaro DPO (UIP&RCH)-i, palliative care ya health dak sendakba tekangshi tulutem nokdangtsü aser anepalutsü aser taküm

jenjang tajungba kümdaktsütsü atema lir ta ashi. Iba yagi shirangertem aser parnok kinungertem shitemang nung timtem dang masü saka psychological, emotional, social aser spiritual tekangshi dena bentettsür, ta lai ashi. Sentong nungsa Chief medical officer Dr Tiasunep-i, palliative care indang concept lemsatsep, kong pai shirangertem aser parnok kibongtem taküm jenjang, jenjang aketba health

care, shisatsü aser discipline indang lemsatsep. Training nung shisalen sayurji CHC Mangkolemba SMO Dr Sentiyenla liasü. Training ya palliative care kübok onük balala ayimjema sayutsü nükjidong nung ayongzüka agiogo, kong palliative care metetdaksüba, WHO analgesic ladder aser healthcare worker kati koda pei health care unit nung palliative care agütsütettsü item ajak densema liasü.

NPP candidate I. Abenjang-i pa election aitsü Longkhum nung declaration agütsü

Longkhum yim, 26th March (TYO): National People's Party (NPP) ya Aor aser Naga nunger asoshi tapet party ka lir, ta 26th March, 2026 nü I. Abenjang shiba 28-Koridang A/C by-election nung NPP candidate ka ama tokteptsü lir, pa indang declaration sentong ka Mongsen Langpang, Longkhum yim dak akadang pai metetdaksü. NPP ticket ya pa nem masü saka Longkhum nem agütsüba lir, ta pai pelaba metetdaksü. Teraksa tulu adoker election takok angubajibo kecha tajangzüik malitsü, anungji, ochi aser yimjung nung takok angutsü merangtsü, pai yimertem ayongzüik. Paisa "temeimji kü indang election omen lir", ta metetdaksü. "Ni election-i aiba ya ni jurila ajangzüiktsü atema masü, saka chichiba nung nübur tenzüiktsü tejangraba nung noktaker", ta ashi. Anungji, yimertemi pa nem yimli aser maongka agütsütsü asoshi paisa mepeshia metetdaksü. "Tia junga na adokra, küm ana tsüingta nai Koridang sanger asoshi kechi inyaktsü?" ta

metetnua asüingdangdang, "teinyaktsü aika lir, saka ajak dak alia ni nübur meimtsü, nai kodang nübur meimdir Tsüingremi teinyaktsü wadang shisatsü agütsütsü", ta pai ashi. "Yangi yim dak yimtsüing aser town ward densema lir, anungji, parnok taginüba repranga inyaktsü", ta paisa shisem. "Koridang assembly constituency ya regional mungjen ka lir, anungji, naia Naga yimden tebilemstü aoshi koba tashi shilem agitsü bilemdar?", ta asüingdangdang, "tsüraburi Naga linük asoshi koba nükmén amenteta yuja kar, iba nungji nia noktaka lir, aser ibaji kümzüka aser wazüka ayutsü asoshi merangtsü", ta langzü. "Na lanur candidate ka asünung, na adokra nai lanurtem asoshi kechi inyaktsü bilemer?" ta asüingdangdang, lanurtem atema teinyaktsü aika bilema lir, anungji, mapang nung itemji inyaktsü, ta ashi. Nai constituency sanger dang teshinüba kar ali asü? ta ashidang, iba by-election ya political revival ka ama nüburtemi sarasadema atar

shiba dak lenisütsü sempet lir, pa nem ne senti vote ji agüjang ta pai ayongzüka ashi. "Tanü iba sentong nung nübur telangzüba koma lir?" ta asüingdangdang, tanü iba sentong ya ni imlaba dang nungi kanga agi tajungba, joko nüburtem tangatetba dangi aruba angur aser yimertem lungjemtsü imlar, ta pai ashi. "Election maparen tenzüker mezüing anogo nungi Tsüingremi kanga yaria arur aser anogoshi meilongi jenjang tajungba renloka aobaji meteta arur, ibai Pa sentong asütsü ta amanger aser takokji ana nung dang lir", ta pai teimla o ka lemsatsep. Iba sentong nung NPP National Vice President, Vevoy Wideo, Abenjang meimer, Longkhum putu yimsüsür, tebu-tedi aser lanur kari shilem agia akangalong o balala lemsatsep. Tsükdakradang kecha majurura NPP tokolakba aser Meghalaya Chief Minister, Conrad Sangma, March 31, 2026 nü Longkhum-i Abenjang asoshi nübu yimtsüi arutsü, ta NPP ketdangsüri metetdaksü.

CEO-i Control room indang metetdaksü

Dimapur, Metsüremi/March 26 (TYO): Chief Electoral Officer, Nagaland-i sangdong ka ajanga, 28-Koridang Assembly Constituency Bye-Election dak sendakba nung Control room inyaktsü nung tenzükdaktsüba metetdaksüogo. Election dak sendakba ken o ajak aser iba den Model Code

of Conduct (MCC) nung aibelenba atema tashishibatem ajak helpline number 1950 (Toll Free No.) mesüra teküboklen agüja aliba number ajanga tongteprateptettsü. 1. State Control Room: 8787725554 2. District Control Room: 8787890205/03692225015.

Mkg nung polling personnel tem training agiogo

Dimapur, Metsüremi/March 26 (TYO): Taruba 28 Koridang A/C bye election atema Mokokchung district kübok polling personnel tem training tanabuba round Mayangnokcha Government Higher Secondary School, Mokokchung nung March 26

nü agiogo. Trainees tem den jembiba mapang ADC Mokokchung, Atsung Walling-i, parnok dang parnok mapa tamakok maludaktsü inyaktsü atema training mapang tesayubatem nendak nendaka angazüktsü ajungshia liasü.

NNPSGSEF-i sorkar dang temulung masüba lemsatsep

Dimapur, Metsüremi/March 26 (TYO): Nagaland National Pension System Government Service Employees Forum (NNPSGSEF)-i, Nagaland sorkari Central Civil Services (Pension) Rules, 1972 (Now 2021) kübok Old Pension Scheme (OPS) asüingsashitsü atema takhangba agütsüba mapang talangka mataloktsüba atema mepelaba metetdaksüogo.

agütsütsüba tangatetba dak ajemdaker pension nung tebandang aliba dak sendakba nung iba lokti tentet yagi Chief Secretary nem aiben shiti agütsüogo. Iba den külemi National Pension System kübok aliba employee tem nema kasa tajangzüik agütsütsü khanga yimjung nung longkak aiba amala sentong balala ayongzüka agia aruogo.

2022 küm iba lokti tentetba sülen parnoki National Pension System (NPS) kübok employee tem ajak tebilemstü mapang balala nung lemsatetpa arudar. National Pension System ya market-linked pension system ka lir aser iba kübok employees tem mapa asoshi meyipa kecha magütsür. Sorkar tenzükertem mapa asoshi return/pension kecha magütsüra mapa nungi anenba sülen parnok financial security mali. Supreme Court-ia, Pension ya charity mesüra bounty ka masü. Iba ya pei temeden ka lir ta shiogo, ta parnoki ashi.

Ajisüaka sorkari tang tashi nung kecha jenjang agia mali. Sorkari iba ken o sensaksemstü atema atsülanga aoba kuli balala agüja arudar. Kasa mapang nung official osang ka magütsüba ajanga employee tem ken o mejangjai akümba den temulung masüba tali küma odar, shirnok state tenzüka sülen financial security dak sendakba nung ken o tejangja ka dak metaloker lir. Item ken o dak ajemdaker iba lokti tentet yagi sorkar dang 14buba Nagaland Legislative Assembly Session 8buba Phase II nung iba ken o ya benoka sensak asemstü aser ken o jangja jangja metetdaksütsü mepeshia metetdaksüogo. Parnokisa, sorkari kecha telangzüba magütsüra National Pension System kübok aliba employee temi parnok temeden akhangtsü asoshi democratic inyakyim dak ajemdaker longkak aitba sentong kar ayongzüka agitsü akok ta shiogo.

Kasa mapang nung Old Pension Scheme yagi mapa nungi anenba sülena security agütsür. Iba tajangzüik ya 01.01.2010 masü dang shimertembo agia arudar. OPS aser NPS kübok sorkar tenzükertem ajak mapa kasa dang inyakdar, saka mapa nungi anenba sülen tajangzüik balala agütsür. Mapa kasa asoshi taah kasa

Koridang by-election... (TAPAK 1 NUNGI...)

"Na adokra opposition-less government nung adentsü asü?" ta metetnua asüingdangdang, "yamaji kecha bilema mali, saka tangtangbo ni election nung adoker madoker ta asübaji dang ni asoshi tongtibangtiba lir", ta pai langzü.

Mangmetong nunger Imchatoba Imchen ya asür Tsupongmerang jabaso lir aser pa ya March 15, 1975 nung aso. Pa lanuwa Ao Kaketshir Mungdang (AKM), Naga Students' Federation (NSF), Asia Pacific Students and Youth Association (APSYA), Delhi Ao Students' Union amala nung tenzüka aru. Politics tsütsü Forum for Naga Reconciliation, Central Youth Organization (NDPP), Central Youth Wing Naga People's Front amala nung lenia aruba tetangshi nübu ka lir.

Taruba ita ana peritsüsa totzö peria lir: Centre



March 26, 2026 nü Prayagraj nung totzö ishika dang lir, ta olulu prokba sülen petrol pump ka nung totzö alitsüpurtem aika adenshia aliba noksa nung angur.

New Delhi, March 26 (Agencies):

Taruba ita ana jungnüa peritsüsa India nung totzö peria lir, anungji olulu prokba ajanga nüburtem maoksatsüla, ta sorkari metetdaksü.

Tang West Asia nung rara lia sorkar ketdangsertemi, tang linük nung energy tensa junga dang lir, ta metetdaksü.

Ministry of Petroleum & Natural Gas-i, taruba anogo 60 tashi atema totzö tazü supplies peria rizünga lir, ta metetdaksü.

Totzö supply meraksatsüsa Oil Marketing Companies (OMCs)-i jelia inyakogo, ta

Brihostibarnü sorkari metetdaksü.

Tzüyim ajanga rong nung totzö abenba tongti lenmang Strait of Hormuz nung timtem liaka India-i global suppliers 40 dang nungi totzö tazü agidar aser totzö agi manüngtsü atema linük nung aliba refineries ajak nung mazüngi inyakdar.

India nung totzö reserve capacity ji anogo 74 atema lir aser tang anogo 60 peritsüsa rizünga lir, ta ketdangsertemi metetdaksü.

West Asia nung rara adokba sülen anogo 27 ajungba mapang nung India nung

sensotem ita ana peritsüsa totzö rizünga lir, iba dak alia maneni totzö bener arutsü atema inyaksangshidar, ta ketdangsertemi metetdaksü.

Sorkari, linük tesem kecha nunga petrol, diesel mesüra LPG agi manünger aser petrol pump ajak lapoka dang lir, ta metetdaksü.

Ministry of Petroleum & Natural Gas-isa, social media nung totzö agi anünger, ta osang kanga prokdar, anungji nüburtem aoksadaksütsüsa online ajanga osang tai proktertem nem temerenshi agütsütsü, ta metetdaksü.

Global Democracy Index nung India 105buba nung ang lir

New Delhi, Metsüremi/ March 26 (Agencies):

Liberal Democracy Index 2025 nung linük 179 nungi India jenjang 105buba nung ang lir; tamalen iba Index nung India jenjang 100buba nung liasü saka ano jenjang pongu agi tamajungba kümogo.

Iba report ya tan hopta University of Gothenburg, Sweden nung V-Dem Institute-i sangdonga liasü.

2017 küm nungi India ya "electoral autocracy" category nung lir.

Iba report ajanga ashiba agi, alima nung nütsüng teimba aliba linük pongu nungi pezübo-India, China, Indonesia aser Pakistan 'autocracies' category

nung lir.

Electoral Democracy Index nung India jenjang 106buba nung lir, Liberal Component Index nung jenjang 99buba nung lir, Egalitarian Component Index nung jenjang 136buba nung lir, Participatory Component Index nung jenjang 83buba nung lir aser Deliberative Component Index nung jenjang 100buba nung lir.

Iba report ajanga ashiba agi, print media aser broadcast media jenjang tamajungba akümba aser tongtibang telemtetba agitsü atema nüburtem den tama jembiba jenjang tamajungba akümba linüktem rongnung India densema lir.

Alima nung autocracies linük 92 aser democracy linük 87 lir aser nütsüng shilem 74 bo autocratic sorkar yimsüsüba kübok alir, ta kasa report ajanga metetdaksü.

2025 küm autocracies linük tasen 10 bendenlokogo aser item linüktem nungi pongubo Europe nung aliba linüktem - Croatia, Italy, Slovakia, Slovenia aser United Kingdom lir.

V-Dem Institute-i iba report ya 1789 nungi 2025 tashi nung linük aser territories 202 nung asadanga liasü. Parnoki linüktem nungi mongin 4,200 nungi shisa agiba den külemi data points million 32 asadanga liasü.

Tanü Ato kilonser Modi-i Chief Minister tem den senden amentsü

New Delhi, March 26 (Agencies): Tang Middle East nung rara aliba dak sendakba nung renema alitsü atema Hokolbar nikongdang Ato kilonser, Narendra Modi-i video conferencing ajanga chief minister tem den senden amentsü.

Supply chains, energy aser emergency sectors densema tongtibang sectors aika nung state tem renema aliba jenjang asadangtsü.

Iba ama tensa ka nung Centre sorkar aser state tem tsüngda amalitepa alitsü nükjidong nung Ato kilonseri iba senden ya ayongzüker.

"Team India" tangatetba nung Ato kilonser Modi-i tang ama alima tensa mejangjai aliba mapang ka nung Centre aser state sorkartem amalitepa inyaksü aser osangtsüsang lemsateptsü atema ajungshitsü, ta osang angazüker.

Assembly election agitsü aliba states aser union territories-ibo iba senden nungji shilem magitsü, kechiyong item states nungji model code of conduct (MCC) benoka lir.

Election agitsü aliba states/UTs ji West Bengal, Assam, Tamil Nadu, Kerala aser Puducherry lir. Ajsüüaka cabinet secretariat-i ayongzüka item states nungi chief secretary tem temeja senden mena terenemshiba jenjang asadangtsü.

Middle East nung rara ajanga India nung rongsenkettzüng kongshiba aser totzö densema energy sector kongshiba tensa ya Centre sorkari mita repringdar.

Bodhbarnüa Parliament nung party ajak senden nung union minister temi opposition party nung lenirtem nem iba tensa osang tongmelang agi metetdakja liasü.



March 26, 2026 nü Dehradun nung Uttarakhand Chief Minister, Pushkar Singh Dhami-i Dehradun-Pithoragarh flight service (42-seater) tenzüksüdang tangokba noksa nung angur.

EAM S Jaishankar G7 senden nung adener

New Delhi, March 26 (Agencies): External Affairs Minister, S Jaishankar, Abbaye des Vaux-de-Cernay, France-i oa Brihostibar nungi tenzüka G7 Foreign Ministers' senden nung dendar.

France Minister for Europe & Foreign Affairs Jean-Noel Barrot-i jaokba nung ajemdaker Jaishankar iba senden nung adener.

Jaishankar-i linük balala nungi foreign minister tem den jurila senden-a amentsü.

Iba senden nung Ukraine nung rara, tzüyim nung security

asere International yimsüsüba dak sendakba nung o lemteper.

Taküm June ita nung G7 Leaders' Summit nung züngsem linüktem nung tekolakpurtem senden amentsü lia tang Foreign Minister tem senden amener.

Iba senden nung nuclear hadir, timtem ajangshirtem nem teyari agütsütsü aser rara ajanga teraksatsüba yanggershitsu atema jembitsü.

G7 züngsem linüktem dak alia iba senden nung partner linüktem- India, South Korea, Saudi Arabia, Brazil aser Ukraine-ia shilem agitsü.

Saudi Arabia nung asüba kibong kati sorkar dang teyari meshir

New Delhi, March 26 (Agencies): Tawa Saudi Arabia kübok Riyadh nung missile tejaksa ajanga Uttar Pradesh nungi arrshi küm 26 tebur ka asü.

Asür kibong jagi sorkar dang senotsü teyari agüjang aser asür kinüngtsü nem sorkar mapa ka agüjang, ta takhangba agütsüogo.

Ministry of External Affairs aser district administration teyari ajanga Ravi Gopal tasü mangji Bodhbarnü Sitapur kübok Baghain yim tashi bener arutsüogo, aser kasa anogo nungsa asüpila sentong agia tasü mang rongdokogo.

Gopal ya yaküm nungi Saudi Arabia yimtiba, Riyadh nung aliba plastic factory ka nung driver inyaka liasü. Pai pa kinüngtsü den arrshi küm pezü jabaso ka toktsür pilaogo.

Local BJP MLA, Asha Maurya-i, takoksa angur kibongi akhangba ama tekaraba nung teyari agütsütsü, ta nangzüko.

Brihostibarnü osangbenertem den jembidang Mahmudabad Sub-Divisional Magistrate (SDM), B K Singh-i, "Par kibongi senotsü teyari den külemi sorkar mapa ka agüjang ta mepishiogo. Onoki ibaji asadangtsü," ta metetdaksü.



Kerala nung kobi melii assembly election agitsü lia March 26, 2026 nü Kochi nung AICC General Secretary, Sachin Pilot-i osangbenertem den jembiba noksa nung angur.



TIR YIMYIM

YIMOBILEM (EDITRIAL)

DIMAPUR FRIDAY, FEBRUARY (METSUREMI) 27, 2026

TB TASHIDAK

- Tangsen Lemtur

Yakünüba World TB Day anogomong nung, alima nung tuberculosis (TB) tashidak agi shiranger shilem 25 bo India nung lir, ta metetdaksüba osangji mamangtetsüka lir. Nüburtem nem iba tashidak rajema kümdaktsütsü aser iba tashidak meshimeshia samatsütsü nükjidong yur küm shia March 24 anogo nung omen balala nung ajemdaker 'World Tuberculosis Day' ayongzüka amunger. Taküm küm atema World Health Organization (WHO)-i shimtetba omenji 'Yes! We Can End TB! Led by Countries. Powered by People' lir. Rongdak süa iba tashidak samatsütsü, linüktem leniba nung raratsü aser health workers dang masü saka lokti tentetem aser lanurtem densema ajak longjemer iba tashidak samatsütsü tayongzükba agüja iba omen shim. Alima nung nisung jenti tepsetba tashidak rongnung iba tashidak ya densema lir; 2024 küm kija nunga iba tashidak agi alima nung nisung million 1.23 süogo. India nunga iba tashidak agi 2014 küm nisung lakh 2.2 asü aser 2015 küm nungbo iba dang nungi anasü agi tali, lakh 4.8 asü. 2024 küm India nung nütsüng lakh 1 shia nung nisung 21 bo iba tashidak agi asü. 2030 küm tashi nungbo alima nung TB tashidak meshimeshia samatsütsü Sustainable Development Goals (SDGs) nükjidong rongnung densema lir aser iba dak sendakba nung WHO-i alima linüktem dang TB anema longjemer raratsü atema ajungshir. 2000 küm nungi tenzüka TB tashidak anema rarar, aser iba tongbang tesadang dang tali kokogo, kechiyong tesüiba 25 tsüngda nisung million aika iba tashidak nungi kümzükogo, ajisüaka iba takokji tongbang tesadang ka dang akokba ama züngshir, kechiyong tang alima nung anogo shia iba tashidak agi nisung 3,500 nungi 4,000 shi asür. Alima sorkartemi longjemer research agirtem, lokti tentetem, mulungtet teloktem, nija sector aser terenlok agency tem den teka amteper inyak nungdang iba tashidak samatsütetsü. Iba tetezü, TB tashidak anema ajak longjemer raratsüla. TB tashidak yagi tepokpok nung kongshir ajisüaka tanga tenük-telen nunga kongshitsü akok. TB aketba temaitsü kar dang lir aser item temaitsü rongnung tali akütba, alok-metzü nung azü densema aliba, aonung asentzü tali asenba aser temang touzük kanga ajema akümba densema lir. Ano temang nung tanga tenük-telen nung kongshira item temaitsüjibo balaka asütsü. Tepokpok nung TB tashidak aketertemi aküttdang, metzü metsüdang mesüra hachidang mopung nung tashidak prokba ajanga tangar nem-a menaloktsür. Küm shia alima nütsüng shilem katibo iba tashidak menar. Ali meimchirtem ajak kenübossa asütsü, kar tantsür-tambur kümer asütsü, kar ajungben lendong nung asütsü aser kar tashidak balala agi asütsü, ajisüaka alima nung kanga timtemer asürtemji cancer aser TB tashidak agi asürtem ya asütsü. Tashidak kar azüabong tsütsü mazüokba ajanga menar, tashidak karbo tetsü-tebou azü nungi arur, tashidak kar achi-ajemba mazüokba ajanga aser karbo tia makai tangar dak nungi menazüker. Alima metembang tashi tashidak balala alitsü aser poktetsü ajisüaka pei sasa kümdangba, temang nung timtem tilaka adokdangyongi mapang shitak nung temang tendanga medical teyari agiba ajanga asenoki tashidak koktetsü. Tanü WHO-i alimai longjemer TB tashidak anema raratsü sangoktsüdang asenokia pei sasa kümdanga aliba den külemi timtem adokdang mapang shitak nung teyari bushiba aser tangar nem-a iba tashidak indang rajema kümdaktsüba aser teyari balala indang osang lemsatepba ajanga iba tashidak anema raraba tongbang nung asenoka shilem agir asütsü.

OLEMSABANG

AOMONGCHEN OTSÜ

~ Temjenyuba Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Otsüla aser obula: Oh! Apetasong kecha maka kanga tepenjem, soropangro tajung, akhm taket, kakat shisatsü amena bener aliba lanur tajungtem khen ataliangjo. Iba sentong ya tenzüka maodang aser iba sentiseppi nenok nem magütsüdang na shiba, na kolen nungi aser kechi telok nungi metetpelaba mapang agidi kechiaser kenati nenok indangji jangja jangjaa metetnür, anungji ka khen ka khen ta metetpelateba tenzükdü, anungji nenok nungi tenzükung.

Tesatempa Telok: Onok ya tesatempa telok lir aser onok ya tsümar ao semer adenshidak tzü adena or alima tesatem nung sadem sadema meyoktepa kati ka jangjatsü kangabo mejangraba tesem nungi lir. Onoki tzüpak tzüsem adena or aliba indang ajak jungjunga meteta lir anungji sobalibaji meliaka aser mebenshiaka onok sadem sadema dang alir.

Obula Metetsang: Oh! Tesademba telok, nenok ya tesungmangtsü ka ato ya, alima tashitemetetbo jenti dang kar aser nenoki memetetba kecha mali saka ajiangjo nenoki abena aliba süji kechi kin indang ya? Asen Aomongcheneri abenba indangbo masü ato. Hai tetsü! Khen jungjunga ajiangjo nibo parnok ngur kangasa temolung ani mesüngzüker. Ya asen ao kin ayak tongtipangsa Aomongchener tem to yamai dang kümatokoko na? Temolung mayanger na?

Otsüla: Ibaya kechi tai? Yimten, arogo mesüra kija kibongi lanu asensortem dang temolung magütsür asü mesüra tsüraburi ali rongsen agi dang mesüteta anitetta tesadem lima nungji kecha mezüngshi, mesayu doktsü asü?.

Obula: Hao hao tetsü, kija kibongi aser lokti ajaki khen parnok nem temolung agütsütsüla tim kechiaser asung asen arogo yimten yimli nüklajibo parnok tapubang nungang lir.

Obula: Sürabang tesademba telok, nenoki abena aliba süji kechi indang aser kong nungi lir?

Tesademba telok: Uncle and aunty onoki abena aliba sü dang ya sama-chari sü ta ajar aserbo iba sü ya parnok benjong kati aodang onok nem agütsüba lir. Anungji onoki iba sama-chari sü ya senti rongsen amai bilema iba sobaliba metetba lanu asensortem sentongi abener aruba lir.

Obula: Aya! Tesademba telok nenok tetsü tebou mesüra nenok tsüraburbo onoki jungjunga dang meteta lir ako, shir chir, shir semchir, kechi kidong nungi jakzüka aruar item ajakji meteta kar. Kechiba onok tain dang uncle aunty ta ajar, iba yabo ali poker jembia aruba asen tetsü oshi jayajakobo masü ato! Iba ya tzü adena or aliba nisung oshi, anungji nenok ajaki kena dang otsü obu ta tanü nungi ajatsü. Taser ano tongtipang kaji iba amala asenok aoer senden kati arudangbo sama-chari süji masü saka meraket keta teburi tsüngkotepsü mesüra tetsüri etsüng sü abener perang peranga ni Aor chanu ta arutsüla ato. Tangari na kong nungi, kechi kin mesüra kechi yimer ta masüngdangdang yongi nü indang sobutsü ayak mesüra jayajako, jembishinü agi sayutetra iba jagi na Aomongchen yimti jala aser jabaso, akhum taket Aor chanu ka ama nenokji asen ao kin asoshi sentsü, konang aser narokum ka lir.

Tesademba telok: Aya! otsü obu nenati kangasa jungjunga taroktiba nung onok dak maliba ka angateta ratet rateta shiogo iba atema kangasa pelara. Onok ya tenüngbo ao kin nungi saka aoer senden nung khen danga metendang aser moudang. Aji oda süaka shingai onok dang kecha mashir, majar, shilem balala kecha nung mamshir saka tesademba lima asünungji item nung jagi pilar sadem sademadang liteper. Alima indang shia metetbaji onok atema teperi, onoki kechi jembir, kechi sobur, kechi tenüng ajar kecha tongtipang ka masü ta bilema liasü saka tang nungibo aoer senden ajak nung züngsem tajung ka ser jangyu metema anidaktsü. Nena tanü süngmangseta aser temolung shiranga bilema onok metongshitsüba, onok dang sayuba jagi onok Aomongchen yimer ka ama, aser Aor chanu ka ama len anidaktsütsü aser metangtangi bushiloka aser asüngdangya süa aotsü. Kangasa pelara Otsü Obu.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

NEICC-i Rev. Dr. Meyu Changkiri General Secretary shimogo



Rev. Dr. Meyu Changkiri

March 26, 2026: North East India Christian Council (NEICC)-i 2026-30 kümsük atema Rev. Dr. Meyu Changkiri General Secretary shimogo.

Naga nungertem rongnungbo NEICC nung mezüngbuba General Secretary ji pa asütsü.

1937 küm iba council ya tenteta liasü.

Rev. Dr. Meyu Changkiri ya tang Shillong Ao Baptist Arogo nung pastor teinyakdak. Pa tesüiba küm 18 tashi Shillong Ao B/A nung pastor inyaka arur.

Sannükba mapa dak alia

Rev. Dr. Changkiri-i North east region nung theological shisaliok aser Christian leadership tsütsü tongti shilem aika agiogo.

Pa ya Clark Theological College, Aolijen nung Board of Governors nunga Chairman lir, NEICC Trust Management Committee nung züngsem aser Serving in Mission (North East India) nung Treasurer lir.

Taküm May 21 nungi May 24 tashi Meghalaya state kübok Tura anasa Resubelpara nung Garo Baptist Convention-i NEICC 5buba Biennial Assembly ayongzüka agiba

mapang nung Dr. Changkiri-i NEICC General Secretary mapa agizütsü.

Taoba NEICC Biennial Session ya yaküm May ita nung Jalukie Town Baptist Church nung ayongzüka agia liasü.

NEICC ya tamasabo Assam Christian Council liasü. Iba tentet ya 1937 küm November 23 nü Shillong nung Arogo lenirtem aser mission organisations-i tenteta liasü. 1962 küm iba tentet nüngja 'North East India Christian Council' ta melen.

1952 küm Council-i Meghalaya kübok Barapani nung Union Christian College (UCC) amenok aser tanübo iba reju nung Arts, Commerce aser Science azünger meyrjang aika lir.

2016 küm Council-i UCC Higher Secondary School tenzüka liasü.

Tangbo iba Council nung state trok- Assam, Nagaland, Meghalaya, Mizoram, Manipur aser Tripura nungi züngsem Arogo 37 aser associate units 18 lir.

Iba tentet nung züngsemtem rongnung Baptist, Presbyterian, Lutheran, Evangelical aser tanga Protestant densema lir. NEICC nung Nagaland Baptist Church Council aser Council of Baptist Churches in North East India densema lir.

Iran nung Khrista osangtajung proktsü atema kishi lapokdar

March 26, 2026: Tsüngremi Iran nung mapa tulu inyaktsü, ta tamang nung America nung Arogotem aser ministry balalai renemdar.

Kobi melii Iran nung Yisu Khrista osangtajung proktsü atema kishi lapoktsü, ta tamang nung Khristantemi sarasadema renemer.

Tang Iran nung rara aliba mapang nung Iran nunger Khristantemia Tsüngremi mapa inyaktsü ta amanga par linük nung yimsü temeden alitsü atema sarasademer.

Vision Beyond Borders Tir, Patrick Klein-i, "Parnok maneni adenshia sarasademdar. Parnok kanga kümdangkümdanga lir," ta metetdaksü.

Osangbener den jembidang pai, tawa pa den Laishiba shibelenba team kati Armenia nung senden ayongzüka menogo, ta metetdaksü.

"Arrotsülen truck aika lir aser anogo shia arrtsü adena totzü abenba tankers meyrjang aika totzü bener Europe-i aoer. Ozü team arrtsülen jagi oa sarasadema Tsüngrem dang arrtsü lapokjang ta mepishiogo," ta paisa metetdaksü.

Eastern European Mission tatong Tir Dirk Smith-i, "Kishi lapokdar. Kishiji lapokra tzümetsüng ama tzülok ayimtsü," ta metetdaksü.

Smith-i aniba team-i tanurtem aser tainlonglongpurtem atema Laishiba aika yoktsü renema lir;



iba dak alia Farsi oshi nung adokba Laishiba-a aika Iran dangi yoktsü.

Khristan karibo, Laishiba shibelenertemi khen atasa-a alitsüla, kechiyong civil war ajanga Khrista osangtajung proktsüji kanga tasak asütsü, ta ashir. Smith-i, "Khrista osangtajung prokba ajanga lendong ajurutsü asü? Nisung kar den Yisu indang lemsatepba ajanga lendong ajurutsü asü?" ta asüngdang.

Smith-i, :Tsüngremi sarasadem langzütsü, aser ibaji Berlin Wall ama asütsü. Puti otsü asütsüsa temelenshi tulu adoktsü," ta pai ashir.

"Onok renema lir, ta onoki sarasademer. Onok aotsü atema renema lir. 1989 küm Wall chirepba mapang nunga yamaji atalok. Iba sülen maongka angu. Kodang asenoki

sarasademdir Tsüngremi item kishi lapoktsütsü. Wall chirepba ajanga asenoki telungi itet aser Laishiba meyrjang aika lemja liasü," ta Smith-i ashir.

Klein-i Khristantem dang, Iran nunger ajak ket nung Laishiba alitsü aser sademsadema Lai züngtettsü atema sarasademjang, ta mepishia metetdaksü.

"Nisung kati Laishiba angu, aser ibaji ajanga pa kanga pelaa liasü. Pai yamai ashir 'Joko kü ket nung ochi lir. Ni melungba mashie mapang nung ni Lai züngtettsü'. Pa ket nung Tsüngrem O aliba ajanga pa kanga pelaa liasü," ta Klein-i ashir.

"Tsüngremi Iran nung temelenshi bener arutsütsü, aser ibaji ajanga Islamic lima ajak kongshitsü, ta ni amanger," ta paisa shisem.

ANOGO ABEN TSÜNGREM DEN

Taküm Tasen

Anungji nisung kar Khrista nung lira, pa tasen poktetba. Tejenbaji süiogo, ajiang, ajak tasen kümogo. 2 Korint 5:17.

Yisu ne mulungi aitung ta asüngdangba agi na khristan ka maküm. Kodang na tanaben aso, na Khristan ka aküm. Yisui ashi, "Atangji Züngpung ni ne dang shidi, tanaben mesora, nisungi Tsüngrem yimli mungutettsü" (Yn. 3:3). Sarasadem ka ashiba mesüra yimjak nung telemtetba agiba mesüra telemtetba agi card ka sign asüba agi na mekümzütsü. Tanaben asoba agi dang aji inyaktsü akok. Tenyar Pauli ashir, kodang na "Khrista nung lidir" tejenbaji süitemer. Na tekümtet anguba anogo nung nai menaa aliba temenentem ajak adoker. Yirur na timtema aruba ajak tanebtsü angur. Nai tamakok ngua arua liaka temeim aser agizükba ne meyong akümer. Timtem tekangshi ajak joko mali moatsür.

Kari na tanela nung tanaben asoba tesüngmangtsüji nemaa kümdaktsütsü ashiba nai angashitsü akok. "Tang na "Khristan süa nai tesüiba nung kechisa ajangshia aru ajakji ajangtsü aser ibaji akoktsü mapang agitsü" ta mesüra, "Na tanaben asotsü akok saka maneni na temenen den rarateptsü, aser nai ne tashi mait nung takok angutsü ta yimlar.

Tebilemstüji shibai na tanaben sodaktsür pa dangi asen taküm aotsü melen aseni merangba agi tanaben asotsü merangbaji lir. Na temenen nungi nüji akümstü asoshi Laishiba nung tabensa kuli agütsübaji Yisu Khrista aser Tsüngremer chir asütsübaji teperi. Satani ibaji masü ta na mesüzüktsü bushir. Shiba dang nai amangtsü?

State sorkari Arogo madak tashi amshitsü makok: High Court

March 26, 2026: Kerala nung Communist-i aniba state sorkar dang, sorkari Arogo trok madak tashi amshitsü makok, ta obendang agütsü.

Oriental Syrian Orthodox Church of Antioch telok ana tsüngda mangatettep aliba dak sendakba nung March 24, 2026 nü Kerala High Court-i 2024 küm August 30 nü judge kati agütsüba obendang agientsüogo.

2024 küm judge jagi Ernakulam aser Palakkad district na nung sorkar ketdangsertem dang Arogo trokji aziüoktsü tetuyuba agüja liasü.

March 24 nü Justice Anil K. Narendran aser Justice Muralee Krishna nati akümba bench-i, judge kati agütsüba obendangji maneni benoktsüsa onoki kuli mangur, ta metetdaksü.

2017 küm Supreme Court-i Orthodox telok nemArogo aika madak tashi agüja liasü,

ajisüaka iba obendangji mapa aliba temaba court-i küma mebenoker.

Kerala nung Jacobite telok aser Orthodox telok na tsüngda Tenla ki aser Arogo meyong kiojen madak kibur raktepba mangatettep ya küm aika tejaklen tenzüka liasü.

1911 küm telok ana küma lemsaba sülen nungi iba mangatettep adok. 1934 küm temzüng ka kübok telok anaji tanaben longjema liasü saka maneni 1973 küm nung ano lemsa. Iba mapang nungji telok ana jagi pei nütsüng teimba aliba tesemtem nung Arogo meyong kiojentem madak kibur aküm.

Tang Orthodox telok nung tongtiji Kerala nung lir aser Jacobites tongtiji Antioch nung aliba patriarch lir. Jacobite telok ket nung Arogo 1,100 aliba dak sendakba nungi mangatettep adok. Orthodox telok ket nungbo Arogo 60 shi dang lir.

Supreme Court-ibo item Arogotem shidakba kiburji Orthodox lir, ta shiogo.

AO OSHI ANGAZÜKDAK:

TANÜ ANGAZÜKTSÜBA OJANG



Wana

(n) kinü tanur narong nung anuba naro (ear ornament for infants)

* Kinü tanur dak tenarong tutsür wana anutsür.

Wangdak

(v) mi anasa lemdaktsütsü ayuba (keep nearby fire place to warm)

* Chi chipo ajungzüker mi anasa wangdaka ayu.

OLONG PAITEP # 7456

15x15 crossword grid with numbers 1-17 indicating starting positions for words.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S___i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatemangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 7455 TELANGZÜBA

TIPIEN :

- 1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa, 15. Putir,
16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

Churachandpur-Bishnupur arrtsü maneni meita odar

Imphal, Metsüremi/March 26 (Agencies): Bodhbar aonung Manipur kübok Churachandpur-Bishnupur arrtsü nung mejangjaba nisungtemi injang aika khaloktsüba sülen security force temi meita aoba sentong ka benokogo.

Iba lendong ya Phouljang/Gothol anasa atalok aser iba ajanga nüburtem mesüngjemteti kümdaktsü. Injang ya Phougakchao Awang Leikai army post dak khalokja liasü.

"Bodhbar aonung mejangjaba nisungtemi Churachandpur aser Bishnupur districts na arrtsü nung injang khalokja liasü," ta ketdangsurtemi ashi. Bishnupur district kübok Churachandpur den arrtsü anasa Phouljang/Gothol nung injang kha-a liasü.

"Onoki koba tesem nungi injang akha aser kong khaloktsü aji jangjatsü merangdar," ta ketdangsurtemi ashiba den, iba tatalokba ajanga nüburtem

mesüngjemteti kümdaktsüogo, ta shisem.

Manipur police sangdong ka ajanga ashiba agi, March 25 aonung 11:40 ako shi nung Kuki telungpurtem asütsü ta temulung melemi bilemertemi Phouljang/Gothol tesem nung injang khaloktsü. Parnoki Phougakchao Awang Leikai nung Indian Army post leni injang khalokja liasü.

Iba tesem nung amenoker aliba Indian Army aser Central Reserve Police Force (58th Battalion) temi meyiper injang khaloktsü aser iba sülen telok ana tsüngda ya minute 30 shi khatapa liasü.

March 26 nü anepdang züngia lia nungi Indian Army, CRPF, Manipur Police, aser Indian Reserve Battalion (IRB) nung longjemer iba tesem meita odar.

Tensa maneni asadanga atadar aser security force temi maneni meita aoba sentong benoka inyaksü, ta kasa sangdong ajanga metetdaktsü.

CM Sarma-i Bajali medical college yanglutsütsü nangzük

Bajali, Metsüremi/March 26 (Agencies): Assam Chief Minister Himanta Biswa Sarma-i Bodhbarnü Bajali nung AGP candidate Dharmeswar Roy atema nüboyimtsüba mapang tenangzükba agika agütsüogo, aser ashiba agi NDA-i sorkar kümtetra iba tesem nung temelenshi aika adokba ajangshitsü.

Bajali kübok Barbang nung nüboyimba sentong nung jembiba mapang Sarma-i, iba constituency nung medical college ka amenoktsütsü ta ashi. Paisa, iba mapa atema ali bigha 100 shi alizüktsü asoshi lenir tejen Ranjeet Kumar Dass nem mapa nongloktsüogo, ta ashiba den iba amala terenlok ya BJP-AGP alliance medenibo takok mongutetsü, ta shisem.

Chief Minister-isa, AGP teyari medeni opposition tashi akoktsü tamakoktsü ta ashi. Pai voter tem dang AGP pusemstü mepeshiba den party nem vote agütsübaji Ato Kilonser Narendra Modi aser pa pusemba ama asütsü ta ashi.

Assam Pradesh Congress Committee (APCC) tir Gaurav Gogoi anema jembiba mapang Sarma-i, Barpeta Medical



Assam Chief Minister Himanta Biswa Sarma-i Bodhbarnü Bajali nung AGP candidate Dharmeswar Roy atema nüboyimtsüba mapang jempiba noksa nung angur.

College tenüng nung kecha temelenshi marutsü ta ashi.

Paisa, Lurinjyoti Gogoi densema opposition lenirtem aitsüogo aser ashiba agi, parnoki Bajali nung medical college ka amala terenlok mapa benoka minyaktetsü.

Par sorkar takok indang jembiba mapang Sarma-i, BJP-i aniba teloki sorkar mapa lakh 1.75 agütsüogo ta ashiba den, parnok nem sorkar kümtetdaktsüra mapa ya lakh 2 tashi agütsütsü ta ashi.

Paisa, ochishia inyaksü atema par sorkar bendanga agütsür lir aser iba ajanga kaketshirtem mapa asoshi

sübokrem agütsütsü madoker ta ashi.

Sarma-isa, Assam nung maitsü aser senmang wazüka ayutsü koda tongtibang iba indang lemsatepba den nüburtem dang maneni longjemer alitsü ayongzüka liasü.

Taruba election ya yimden yimsüsüba tsütsü tetoktepba ka dang masü saka maitsü wazüka ayutsü aser maneni renloka aotsü asoshi kanga tongtibang lir ta ashi.

Pai Bajali nung voter tem dang AGP candidate Dharmeswar Roy nem vote agütsütsü mepeshia liasü.

Advertisement for FSSAI (Food Safety and Standards Authority of India) featuring logos, a smartphone showing the official WhatsApp channel interface, and a QR code to scan for updates. Text includes 'Welcome to the Official fssai', 'Daily Updates on Safe Food Practices', 'Nutrition Awareness', 'Healthy Eating Habits', and 'Food Safety Advisories'.

Israel-i Strait of Hormuz anasa IRGC Navy tekolakba tepset

Tel Aviv, Metsüremi/March 26 (Agencies): Strait of Hormuz anasa Iran nung rongnendak yimti tongtipang, Bandar Abbas nung amakdang Islamic Revolutionary Guard Corps (IRGC) Navy tekolakba Alireza Tangsiri tepsetogo, ta Israel ketdangsur temi The Jerusalem Post dang Brehostibarnü ashi.

Iran, Israel aser United States tsungta tang rara aliba ajanga Middle East tesem ajungalen tensa tamajungba kumer aliba mapang alima nung tongtipangtiba 'maritime chokepoints' anasa amakba osang ya arur.

Bandar Abbas ya Strait of Hormuz anasa lir, koba Persian Gulf aser alima nung rong jajaba lenmang sendaktepba tesem tongtipang ka, kong yimjung mapang alima nung shishilempaba totzü aser natural gas shilem 20 shi iba tesem ya ajanga abener.

Tangsiri tepsetba osang ya rara nung tongtipang terenlok ka alitsü, talisa Iran indang maritime operations aser Gulf nung par jenjang asoshi IRGC Navy yagi tongti shilem agir.

Iran-i Strait of Hormuz nung tesashiba soita arur, aser ceasefire asoshi jembishinüba samaa aor ama akumdang Tehran-i iba tongtipang tzü lenmang ya agitsü mera agir.

Iran-i "de facto toll booth" regime" amshir, kong rong kari oset bena aliba, rong nung alirtem mesüra rong aotsü indang osang tejangja Iran indang Revolutionary Guard nem agütsüsüsa akumer ta osang ajanga ashir.

Rong anabo iba strait ajanga

aotsü atema Chinese yuan (China nung sen) nung fees agütsü ta ashir.

Iran nung ozüing yanglur Mohammadreza Rezaei Kouchi-ia parliament nung fee structure yanglutar ta ashi.

"Onoki security agütsür, aser rong aser oil tankers temi iba ama fees agütsüsü tim," ta pai ashi.

Iran-i iba strait amokbangba ajanga alima nung energy markets nung timtem ajurutsü ta tetsübo tulu nung lir, aser Brehostibarnü Brent crude sen \$104 agi yoka liasü, koba rara tenzüker shilem 40 dak tema agi timba alitsü.

Ano kasa mapang United States ya region nung mitkar tashi ulushia amphibious assault ship USS Tripoli-i anir strike group ka Marines 2,500 shi bener Middle East anasai arutar ta osang ajanga ashir.

Iba den 82nd Airborne Division nungi paratroopers 1,000 shi region leni yoktsü totuyuba agütsüogo.

Sepaitem senzüsempongba yagi ground operations tenzüksü tejangja mesayur, saka iba ya ajanga Iran-i Strait of Hormuz tanaben lapoktsüsa akumtsü mesüra Gulf Arab linüktem amakba anentsü akok ta ashir.

February 28 nü Israel aser US nati operations tenzüker American sepaitemi targets 10,000 dak tema nung makogo, ta US Navy Admiral Brad Cooper-i ashi.

"Onok ano metembang. Iran indang military jenjang tuluba nung samatsüsü lenmang ka nung onok lir," ta Cooper-i video message ka

nung ashi.

Kasa mapang Israel tesem kar nung sirens ola angashi, tetetzü Iranian missiles aruba tekumdangtsü, aser Tel Aviv aser Jerusalem nung ola tulu adoka apokba ola liasü ta osang kar ajanga ashir.

Abu Dhabi antüngen missile ka khazüka yokba sülen yinsang tsükba ajanga nisung ana asü aser asem yiru ta ashir.

Saudi Arabia indang Defence Ministry-ia parnoki Eastern Province nung missile aika khazüka yok ta ashir aser Bahrain-ia Bahrain International Airport anasa nisung aliba tesem ka anasa mi remseptsü meranger ta ashir.

Israel-i Iranian infrastructure nung tenük yoker amak aser iba mapang Isfahan yimti anasa tesemtema amak, kong military facilities tongtipang lir aser June ita Israel aser Iran tsungta anogo 12 raraba mapanga maka liasü.

United States-i Strait of Hormuz tanaben lapoktsü densema Iran nem Pakistan ajanga 15-point ceasefire proposal ka agütsüogo ta ashir.

US Tir Donald Trump-ibo Tehran-i tangatetep kati aruner ta ashi.

"Parnoki jembishinü asür, aser parnoki tezüngzüktep ka kangasa yangluner, saka parnoki aji ashitsü tsübor, kechiaser par nübürtemi parnok tepsettsü," ta Trump-i fundraiser ka nung ashi.

Ajisüaka Iranian Foreign Minister Abbas Araghchi-ibo Tehran jembishinü kecha nunga shilem magir ta ashi.

Bangladesh passenger bus ka Padma ayong nung makepok, nisung 24 asü

Dhaka, Metsüremi/March 26 (Agencies): Bangladesh linük tiyonglen bus ka Padma River nung makepoka nisung 24 asü.

Iba buss nungya nisung 40 mena liasü, aser Dhaka nungi mile 62 shi pilar Rajbari district kübok Daulatdia nung rong ka bushia Bodhbarnü aodang maziokteti akum, ta ketdangsur temi Brehostibarnü ashi.

Rescuers temi tzü telung nung aliba bus nungi tanur pongu, tetsür 11 aser tebur trok tasü mang agitet, ta fire service ketdangsur Talha Bin Qasim-i ashik. Tetsür ana iba lendong nungi kumzüker mapang tatsüka lir asü, ta pai ashi.

Bus ya ayong telungi metres 8 (feet 30) shi alu, ta emergency workers temi ashi.

"Bus ya rong kati aitsü ataa aliba mapang ayong nung tziük. Passengers kar bus nungi adok saka parnok kinungertem telung nungi madokteti asü," ta iba lendong atalokba tenük agi ngua alila arishi küm 35 tain Noor Jahan Begum-i osangbener dang ashi.

Online nung prokshiba footage ka nunga bus ya lenmang tesülen nungi makepzüka ayong nung tsükba nguogo.

Fire service units pezü aser tzüshir 10-i anir search and rescue mapa inyak, kong army, police, coastguard aser yangji aliba ketdangsur temi yariteptar. Ketdangsur temi ano passenger aika samar alitsü südi ta ashir.

Bangladesh nung küm shia lenmang aser rong lendong nung nisung noklang aika asür.

Lenmang majungba, gari junga anepalu masüba aser tapi agi gari anishiba mechi iba South Asia linük nung lendong tulu mapang shia ajurur. Tang tesüsa tembangba Eid benjong mapanga nisung 200 dak tema asü ta Bangladesh indang Road Safety Foundation ajanga ashir. Yamaji atalokba ka nung train kati bus ka nung atsükba lendong ka nung nisung 12 asü.

Küm shia traffic dak sendakba nung asüba 5,000 shi lir ta World Health Organization-i ashir, ajisüaka iba dang timba alitsü ta

asadangteter.

2023 küm nisung 31,500 dak tema gari lendong nung asü, koba nisung 170 million aliba linük nung anogo ka nung nisung 85 dak tema asüba ama asadangteter.

MULUNGNEN O



25.03.1976 - 18.03.2026

"La keti züsentetba la nem agüjang, aser la mapa agi yimti süngkhüm nung la sangdakjang"

Apijemtsü Shin 31:31

Temeim Oja, nü mapa tajung onok mulung nung teti alitsü. La akümüli wadang tembanger aliba mapang nung, kija, kibong aser lokti balala, kinunger kwi kati ozü mangyimba khuret nungita yariogo, nenok ajak dang pelaba lemsateper. Nenok Sarasadem, nübu, rongsen aser tesüngzüksü O ajanga onok temlung süngzükdaksü nung ajak dang pelar.

Tsüngremi nenok ajak maneni moajangma.

~ Temeim kinungbo, jala, jabaso aser kinungertem.

MULUNGNEN O



ASO: 21.03.1948

ASÜ: 18.03.2026

John 11:25

"Yisui ashi, shibai kü dak amangdir pa süaka taküm alitsü."

Onoki teti meima aliba temeim Ojala Mrs. Ayangla Imti Longjang (Dimapur) la ajungbena Yisui jar aodang, kinungertem, yimer yimsanger, Arogo aser lokti palala, kiyonger shirnokisa nübo, rongsen aser Sarasadem agi yariogo nenok ajak dang pelaba, jabaso, jala, kinungertem ajaki iba sapang ajanga mamatetba tepela lemsateper.

~ Temeim Kinungbo, Chirnur, Semchir, Anükapang aser Kinunger.

AXIS BANK

AXIS Bank Ltd

A.C. Market, 4th Floor, 1, Shakespeare Sarani, Kolkata- 700071

NÜBURTEM DANG METETDAKTSÜR

Nübürtem dang aser talisa sen apurtem dang Axis Bank nung tsünglanglen shia aliba Branch nung tsünglanglen agüja aliba accounts nung gold ornaments pledge public auction asütsü metetdaksür.

Tsünglanglen shia aliba sen apuri Axis Bank Limited nungi security ama gold ornaments ("Gold Loan Facility") yutsür credit facility agia liasü. Sen apur/kuli sütsür dang Gold loan facility agia aliba nung parnoki temonoktsü aliba menokang ta sangdong agütsü. Ajisüaka sen apur/kuli sütsüri apua aliba sen memonoktet nung bank-i züngzüktepa aliba ama inyaktsüsa akumer aser schedule of property nung shia aliba gold ornaments tem 27-04-2026 anogo anüngdang 11:00 ako nung "As Is Where Is", "As Is What Is", "Whatever There Is" aser "No Recourse Basis" ama auction asütsü lir.

Sen apur aser temenoktsü sen tejangja.

BRANCH_RAC_NAME	Customer Name	Loan A/c No.	Amount Outstanding	Date of Demand Notice	Gross Weight Grams	Net Weight Grams
LHOMITHI BAZAR NL	KIESAMADING LUNGALANG	XXXXXXXXXXXX5547	508576.73	9/Feb/26	101.200	97.800
LHOMITHI BAZAR NL	SANJAY DAS	XXXXXXXXXXXX0383	442228.00	12/Sep/25	80.500	75.400
LHOMITHI BAZAR NL	RAUSHAN KUMAR	XXXXXXXXXXXX2768	201337.66	19/Dec/25	24.500	24.000
LHOMITHI BAZAR NL	AJAY DAS	XXXXXXXXXXXX7057	178176.00	9/Feb/26	23.600	22.900

TERMS & CONDITIONS OF TENDER

Base/Reserve jenjang ya auction anogo nung tenderers nem agütsüsü aser yangji auction bid asütsü. Bank ajanga agütsüba prescribed tender form nung aliba bid/offers dang bidding atema agizüksü.

Bid form/tender mapensa alibatem magizüksü.

Tender documents den terms and conditions ya tekalen agüja aliba branch nungi meshitsüla. Tender document terenem ya branch ketdangsur nem mapa inyakba mapang 27-04-2026 nü agütsüsüla. Mapang süyr agütsüba tenders magizüksü.

Shia aliba properties ya "As Is Where Is", "As Is What Is", "Whatever There Is" aser "No Recourse" yimya nung ayoktsü. Iba property indang standard, purity aser/mesüra danga sentsü, taxasilira, Bank khuret masü.

Tenders ya Bank-i auction anogo tenderers lia lapoktsü, shirnok shia aliba anogo aser mapang offers timba akumtsü/reprangshitsü asoshi adentsü akok.

Branch Names Mentioned Above. Auction Date: 27-04-2026.

Offer/tender khen agütsür tanaben meyipa agütsü makok aser iba article/asset/ornament atema bid/offer ka dang süra bidder temi bid sen inoktsüsüla. Iba article/asset/ornament atema bid ka dak tali süra, bidders tsüngta inter-se bidding alitsü aser timtiba bidder ji 'successful bidder' ta sangdongtsü.

Bidder-i KYC documents ajunga i.e. PAN Number, PAN Card, Aadhaar Card & Address proof etc agütsüsüla. Bidder-i E-mail ID & Contact Number tejangja agütsüsüla.

Offer agizüksü mesüra magizüksü Bank dak temeden lir.

Shia aliba property/offered for sale nung mangatetep adokra, Mumbai nung aliba Courts/Tribunals jurisdiction nung aliba ama inyaktsü.

Date: 27.03.2026; Place: Kolkata

Authorized Officer,
Axis Bank LTD

BCCI-i India team 2026-27 home fixtures sayaogo

Metsüremi/March 26, 2026 (Agencies): Board of Control for Cricket in India (BCCI)-i Brehostibarnü sangdong ka ajanga India team 2026-27 season atema linük nung asayatsü aliba international asayamungtem mapanglem sangdongogo.

India team 2026-27 season nung yimti 17 nung asaya 22 asayatsü lir.

Taruba season West Indies, Sri Lanka, Zimbabwe aser Australia ta team pezüi India semdangtsü, aser cricket asaya format balala asayatsü aser iba ajanga fan tem nem linük kübok tesem balala nung temaba jenjang nung asayaba

international cricket asaya reprangtsü asoshi maongka agütsütsü.

India team linük nung mezüngbuba asayamung ya West Indies den September 27 nü nungi asaya-a tenzüksü. Iba asayamung nung ODI asem aser T20I pongu asayatsü. ODI asayatem Trivandrum, Guwahati aser New Chandigarh nung asayatsü aser T20I asayatem Lucknow, Ranchi, Indore, Hyderabad aser Bengaluru nung asayatsü.

Iba sülen India team December ita Sri Lanka den white-ball asayamung ka asayatsü, kong ODI asem aser T20I asem densema lir. Delhi,

Bengaluru aser Ahmedabad nung ODI asayatsü aser Rajkot, Cuttack aser Pune nung T20I asayatsü.

Maneni India team 2027 küm Zimbabwe den January ita ODI asem asayatsü. Asayatem ya Kolkata, Hyderabad aser Mumbai nung asayatsü.

India team asoshi 2026-27 season ya Border-Gavaskar Trophy ka asayaba sülen tembangtsü. Iba asayamung ya Australia den asayatsü, kong Test asaya pongu asayatsü. Asayamung ya 2027 küm January 21 nü Nagpur nung tenzüksü aser iba sülen Chennai, Guwahati, Ranchi aser Ahmedabad nung asayatsü.

Pep Munoz Bengaluru FC head coach kümogo

Metsüremi/March 26, 2026 (Agencies): Bengaluru FC-i Brehostibarnü sangdong ka ajanga Spain nunger Pep Munoz club indang head coach tasenba asütsü shimba metetdaksüogo. Pa 2026-27 season tatem tashi inyaktüsü.

Club temaba jenjang nung maneni tokteptsü atema merangba mapang Munoz lenisüba nung first team asayatsü.

Pa taoba mapang FC Barcelona indang youth set-up nung inyakogo. Pa Barca U19 aser Barcelona B team den inyakogo aser iba den China nung Qingdao Huanghai aser Shandong Luneng nunga inyakogo. Maneni pa Chinese national team nunga mapang tatsüka inyakogo.

Pa mezüngbuba head coach mapa ya Cambodia nung Preah Khan Reach Svay Rieng nungi inyaka liasü, kong pa küm ana kanga takok ngua inyaker iba mapang club-i league anaben aser League Cup khen akokba den AFC Challenge League final tonga asaya liasü.

Munoz den Ferran Borrás-a adentsü, shiba Bengaluru FC indang coaching staff nung züngsem ka kümogo.

"Bengaluru FC nung adentsü atema telemtetba agitsü kü asoshi temela liasü. Iba ya Indian football nung model club ka lir. Ni külem Spain nungertem nungi club, yimti aser club pusemertem indang tajung dang angashiogo, shirnok



Pep Munoz

India nung inyakogo aser tang India nung tinyakdak lir," ta Munoz-i ashi.

Taküm Indian Super League ya melenshir asayadar aser coach tasenbai iba indang kanga jangja meteta lir.

"Asenok ajaki tang asaya aliba season ya balaka ta meteta lir, saka team hoptashia kanga renloka odar aser tang kü shilemji asayatem nem teyari agüja manen renloka aotsü asoshi asütsü. Ni iba team ya asayaba tesem nung nukjidong akaba, pei sasa dak temulung lemteta yakyaka asayaba team südaksüner," ta pai shisem.

Kasa mapang nung Bengaluru FC kibur Parth Jindal-i, "Pep shimba ajanga onoki atasa-a nukjidong ka yur team yangertsü sentong aliba sayur. Bengaluru FC nung onoki teti onok tebilemba den putepa alirtem nongita arudar aser onoki Pep nukla aser club tamendakdak takang dak tamang akar," ta ashi.

Miami Open: Sabalenka aser Rybakina na semifinal asayatsü



Metsüremi/March 26, 2026 (Agencies): World number one Aryna Sabalenka aser second-ranked asayar Elena Rybakina na Miami Open tetsür kija asaya semifinal asayatsü

Defending champion Sabalenka-i, America tsür Hailey Baptiste 6-4, 6-4 agi akok aser kasa mapang nung Rybakina-i fifth-seeded America tsür Jessica Pegula 2-6, 6-3, 6-4 agi kokogo. Jessica ya taoba küm runner-up liasü.

Taküm January ita Australian Open final nung Rybakina-i Sabalenka koka liasü, saka iba ita Indian Wells asayamung nungbo Belarus tsür la yagi Rybakina madak takok ngua mang yangogo. Sabalenka taküm asaya ka nung dang tamakok ngua lir.

"Küna tawa asaya aika asaya arudar aser asaya ajak kanga toktepba asaya arudar. Ni la den asayatsü yongyaseta atar," ta Sabalenka-i Tennis Channel dang ashi.

Sabalenka atema Indian Wells aser Miami Open naprongla koka "Sunshine Double" akoktsü asoshi asaya ana dang akoktsü nungdaka lir.

Asaya nung Baptiste, shiba

tang mezüngbuba WTA 1000 quarter-final ka asaya liasü, lai Sabalenka indang mezüngbuba service game ana nung break point asem tashi magiteti liasü.

Iba sülen Baptiste-i set point nung double fault menaba ajanga Sabalenka-i la indang serve break asü.

Tanabuba set nung Sabalenka-i kanga kara serve ka break asü, saka Baptiste-ia meyiper serve ka break süa 4-4 aküm. Iba sülen 4-5 ta aliba mapang America tsür la yagi aibelenba ajanga Sabalenka nem takok agüja liasü.

Tanga asaya ka nung Rybakina-i Pegula kokogo. Lai Australian Open aser Indian Wells nunga Pegula koker liasü.

Pegula, shibai taoba ita Dubai nung WTA title benogo, lai mezüngbuba set nung serve ana tashi break süa 4-0 agi tejakdang aküm aser iba sülen asaya koka liasü.

Ajisüaka tanabuba set nung Rybakina-i serve ka break süa la 4-2 aküm aser asaya akokba sülen tasembuba set asayatsüsa aküm. Deciding asaya ya-a Rybakina-i amokbanger asaya-a lai asaya 6-4 agi akok.

RCB pacer Thushara taküm IPL masayatetsü

Metsüremi/March 26, 2026 (Agencies): Sri Lanka Cricket-i fitness policy tesashi ka benoka No Objection Certificate magütsüba sülen Sri Lanka nunger pacer Nuwan Thushara taruba Indian Premier League masayatetsü.

IPL aser PSL densema bendanglen franchise league tem nung asayatsü atema temelaba agütsütsü asoshi board-i tawa physical performance benchmarks tasen ka amenoktsüogo. Pa IPL nung asayatsü atema iba tetendangba ya ajangtetsü nungdaka liasü, saka osang ajanga ashiba agi, pai iba tetendangba majangtet.

Newswire Sri Lanka-i ashiba agi, board-i NOC magütsütsü atema telemtetba agiba sülen Thushara ya Royal Challengers Bengaluru den tenangzüktepba yanglur aliba akoksatsü akok. RCB puri pa crore 1.6 agi alizüka liasü.

Thushara atema kanga dang mapang tamajung ka nung iba ya atalokogo. 2025 Asia Cup nung kanga tongtibang shilem agiba sülen pa T20 World Cup atema meshimi liasü.

Thushara ya anema lir aser



bowling aontsü temsüa lir, saka pa fitness levels repringer selectors' temi policy tasenba kübok iba telemtetba agi asütsü ta bilemer.

Fitness criteria ajang ajanga benoktsü atema board bendanga agütsür lir. Sri Lanka nunger asayar Dushmantha Chameera, Dasun Shanaka, Pathum Nissanka, aser Kamindu Mendis nunger nembo temelaba agütsüogo.

RCB nungi asayar Josh Hazlewood asayamung

tetenzüklen masayatetsü aliba aser Yash Dayal-a masayatetsüsa akümba sülen Thushara ya asayatsü maongka liasü. New Zealand seamer Jacob Duffy den Thushara ya team nung züngoksema asayadaksütsü imla liasü, kechiyong pa IPL nung asayaba tajangshiba bena lir.

Pa IPL nung RCB nungi 2025 küm asayaogo. Taoba mapang pa Mumbai Indians nungia asaya aser iba mapang wicket ti agia liasü.

BILEMDANGANG

"Medemer tamajung den kazüba dang nungibo kija kazü tajungba."